

## **I riòn da Oren cont i cort e i sò cassin, compress al trunen**

A disen che a Oren a sa troven tücc ben,  
a l'è no ona busia perchè a gh'hann resòn,  
per forza: in realtà a l'è a moò vun da chi paes  
che al mantègn semper i soò bèi vècc tradiziòn,

anca se al gh'ha solament trüi o quatter riòn,  
però disem che al fà 3700 e passa la sua popolaziòn,  
quanta gent che ai fest a corren chi volentera a visità,  
perchè num di Sant a gh'ha n'è semper da festeggià,

a gh'è poo on bèll vial, quell da la Rimembranza,  
c'è lè propi on grand splendor cont i so bèi pin  
e al saria: al stradòn in dove gh'è al vècc cimiteri,  
che poo al portà vers al centro dal nost Oren.

Prima da tutt a vori comincià on momentin a parlà,  
e devi di cont diritto nè oh! Dal riòn da la VARISELA,  
cont la cort dal Lomàgna, Simòna, Madin, dal Boschini,  
dal Besàna, dal Circol, dal Sacrista, e dal Brigùrela,

perchè tücc al sann c'a lè on riòn important,  
anca sa l'è quell on poo pussee, disèm, piscinin,  
però, ricordemas e a g'a tegni tanto a dill:  
a l'è ona part bella e anca storica c'è gh'è a Oren.

Se poo a sa vaa in dal famoso riòn dal nost S. FRANCESC,  
cont la cort di Vilèt, dal Minghet, oppur dal Marchesòn,  
propi li visin al Marchesòn, a gh'era i Sciuri Camer,  
la cort dal Zanara, dal Barbòn e poo anca al Zapòn,

in dove a gh'è al Convent cont dentar i nost FRA,  
anca li a devi d'ì c'è l'è conusù, e a l'è minga nanca mà,  
anzi, ogni tant on quei vegèt al ma diseva in dal parlà:  
che propri in da chi part chi S. FRANCESC a l'è passaa,

però cerche no da pretend da vedè on Colosseo,  
ma a l'è come andà a visità on grand bèll museo,  
quindi schèrz a part, ma a l'è vun di post bèi  
c'a l'è passaa sotta a la proteziòn da le belle Arti.

A g'è saria anca da di on quaicòs da la DE GASPERI,  
al riòn un poo pussee giovin c'è gh'è chi a Oren,  
quei li ne oh! Bisogna propi cercà da lassài a stà,  
perchè lor a gh'hann gemò pussee dal cittadin,

però a devi di c'è l'è on grand bòn e simpatic riòn,  
anca perchè al se adatta in qualsiasi situaziòn,  
a gh'è là tanti persòn furestee, ma gent per ben,  
basta a pensà che a in vignu a stà da cà chi a Oren.

E poo .....ricordemas c'è gh'è anca quell da la S. MICHEE  
e tücc al sann c'è lè on grand riòn da competiziòn,  
dopo tutt al se semper fà notà «e tücc a podan confermà»  
quell pussee in gamba in qualsiasi risolutiva situaziòn,

cont la Fabrica, i tre Cort da l'òst vècc, dal Busòtt,  
la cort di Brina, dal Massaia, da la Pesa, dal Feree,  
dal Barbee, la mia cort dal Pulvára, quella dal Romàn,  
dal Fatur, da Rimundu, di Mirèi e la cort dal Vadàn,

e poo a gh'è ona bèlla gesa e on magnific campanin,  
c'è l'è la bellezza e l'orgoli da la popolaziòn da Oren,  
perchè cont i so vòtt campàn compress al campanòn,  
quant a sonan a tà fànn vigni sù la pèll da capòn.

A Oren a gh'è anca tanti bèi cassin, come la Cavallera,  
i Varisc, la cassina Foppa divis anca lor per riòn,  
compress: la cassina Luisa, la Palazzina, la Rampina,  
la cassina Nova, quella di Pòm e poo al nost Pignòn,

a sa poo minga tralasà da parlà dal famoso Trunen,  
perchè a l'era al post pussee frequentà di bagai da Oren  
in dove a sa cercava in tutt i maner sempar da noscondòn,  
da fà prèst per fà al bagn senza fàs scuprì dal padròn.

In poc paroi, a l'è on paes a mo cont tanti paisàn  
e tücc a podan di c'è in bravi, educa e minga vilàn,  
a in no di gent egoista, e hann mai fa nissuna bravada,  
perchè, a l'è ona categoria c'è la viv a giornada,

a ma ricordi ben e a ma sonàn in di urècc anciamò adèss,  
al savì cosa al ma diseva e ripeteva sempar me misee:  
cerchee d'ascoltàm sa vurì fà no la figura dal cudee,  
bisogn no guardà sempar innans, ma guarda anca dadree,

al ma diseva on'altra roba, e devi di cont grand resòn:  
che la correrà la scenza, ma a sa fermarà la resòn,  
qualsiasi al gh'ha i sò pregi e anca i só bèi difètt,  
però: la prima roba a l'è da rispettà pussee i nost vegètt.

Cerche da mettigala tutta per cercà da vess umàn,  
a vedari c'è sa trovarem content sia incoeu che dimàn,  
adèss on bèll proverbi a vori propi divel anca mi:  
incoeu al poo tuccaa a mi, ma on diman a la toccarà a ti.

Occhio!

Anselmo Dal Pulvara